

鄢陵文獻志卷八

鄢陵蘇源生菊邨纂

土地志五

冢墓

許由冢

經志許由冢在甘羅南保 吳志按太史公曰余登箕山其上蓋有許由冢云通志箕山在河南府登封縣昔有許由隱此有墓在焉又名許由山又皇甫謐高士傳許由山在陽城之南十餘里堯因就其墓號曰箕山公則許由冢之不在鄢明矣又按左傳鄭伯

文獻志

卷八

一

以璧假許田今許州有許田保卽此此冢正在鄢許交界處與許田保相近則許由應是許田之訛 道光志按吳說非是許田乃地名非人名安得有冢鄢之有許由冢或相傳之誤今姑仍舊志之文存之不必強爲之說也 明張琳詩讓位唐虞事絕倫寓言巢許迹皆陳箕山有墓空如斧潁水無風淨不塵葉底綠匏仍裊露隴頭黃犢自耕春高蹤千古眞堪訓後世何多受禪臣

彭祖冢

潘自牧記纂淵海彭祖岡在鄢陵縣北上有彭祖墓

經志彭祖冢在西北保正統間知縣吳頗建祠按  
酈道元水經注彭城縣古彭祖國也世本曰陸終之  
子其三日籛是爲彭祖城下有冢彭祖長年八百歲  
綿壽永而亦有葬者蓋元極之化矣酈亦有冢不可  
曉 蒙按吳志以魏武帝子燕王宇字彭祖文帝封  
爲鄢陵王遂以彭祖冢爲燕王宇之墓余攷三國志  
曹璋封鄢陵侯曹宇初封都鄉侯改封魯陽侯進封  
魯陽公下邳王燕王未嘗有封鄢陵之事何緣葬於  
鄢陵吳志誤今正之 明焦琰詩遐齡八百妙參元  
棄世猶看有盡年松老龍鱗同歲月墳封馬鬣伴林

文獻志

卷八

二

泉高名己羨推商代遺恨應知託杜鵑尙想蓬萊千  
載客祕傳何術用真鉛 明于謙詩年垂八百竟如  
何終見浮生逐逝波服御無人傳祕訣道旁高冢漫  
嵯峩

三靈侯冢

經志三靈侯冢又名三賢冢在縣北三里周回九畝  
西屆孔道士隕見獸環石門今掩之知縣孫讚建龍  
王廟於上嘉靖十四年署縣經歷晏玘重修 施志  
三賢未詳 明蘇宇詩三靈侯乎果何人大冢九畝  
與路鄰獸環石門雖常見姓氏不傳那可尋墓旁車

馬日來往接天盈路走飛塵墓中之人無所知墳土  
一任耕者侵誰爲汝守誰爲汝嗔嗟汝富貴且如此  
何況貧賤委荆榛人生百計安足賴齷齪之兒徒艱  
辛

### 唐睢冢

魏書地形志鄆陵有唐且冢 蒙按唐且冢今無攷  
甘羅墓

經志甘羅墓在甘羅南保羅下蔡人秦左丞相茂孫  
年十二能請張唐相燕復請車五乘爲唐報趙說趙  
王得五城以廣河閒還報秦乃封羅上卿史記甘茂

### 文獻志

### 卷八

三

傳所載羅少卽仕秦而墓乃在此未詳 吳志按甘  
羅墓不應在鄆舊志辨之詳矣考史記甘茂得罪於  
秦亡之齊又使於楚楚王欲置相於秦范滂以爲不  
可故秦卒相向壽而茂竟不復入秦卒於魏鄆係魏  
地此當是甘茂墓 蒙按吳志以此爲甘茂墓以茂  
卒於魏故耳然魏地甚廣不獨鄆也何所據而知其  
葬於鄆乎吳志誤 明張琳重修甘上卿祠墓記鄆  
陵邑治西十五里甘羅墓在焉其地因以得名墓巔  
古棗七株環植皆合抱屹立若虬龍然前有廟而創  
建無稽廟塑像而衣冠弗雅邑令三原焦君廷玉自

涖政來每思重建而更新之繁劇未暇舉成化戊子  
春三月乃召里耆張旺輩省諭之衆心樂爲工良材  
美視舊制宏麗矣落成之日肅牲醴爲祭祭畢張筵  
會飲時邑中寮宥咸集而大司徒張公亦與焉俄頃  
有金色蒼龍出廟門東額盤旋上下良久始去衆皆  
愕悚異其感應之速焦君乃起酌予屬爲記余惟甘  
羅乃秦相茂之孫年十二能出奇計呂不韋薦之始  
皇擢爲上卿聲稱後世墓存廟創不知幾千載矣後  
先邑令不知幾百易矣其閒賢否彰彰莫掩而焦君  
獨仰止其人崇列其像誠意流通宜乎神之感格而

文獻志

卷八

四

響應哉酒盡衆客載拜而歸余乃走筆而爲之記

元宋旡詩函谷關中富列侯黃童亦僭上卿謀此時  
園綺猶年少甘隱商山到白頭 明張琳詩豕蟠綠  
樹蔭衡茅風起丹楹雜鼓鐃喚友黃鸝春隔葉避人  
元鶴曉離巢烟凝野色遙通漢影帶川光近映郊道  
左軒車似流水猶疑五乘出秦嶠 明劉訥詩甘羅  
祠下豁塵襟古棗驚看倍爽神曉霧氤氳迷馬鬣秋  
風彷彿動龍鱗才猷未可輕年少野史譌傳早相秦  
卻笑婆娑司馬樹苔埋菌壓弔詞人 明陳棐詩於  
秦獻奇策十二荷朝簪人已歸蒼蘚魂猶抱赤心禽

聲啼密葉螭影動秋陰卻羨仲連子解紛辭萬金  
羅敷墓

經志羅敷墓在縣東二里 施志羅敷邯鄲人邯鄲  
爲趙地今在北直之廣平府屬又香祖筆記敷水在  
華州東水出羅敷谷酈注敷水又北逕集靈宮西相  
傳其墓在鄆不知何據

荆王家

經志荆王家在縣西營南保周八十畝未詳所葬  
庾氏祖墓

施志庾氏祖墓在縣東于家寨

文獻志

卷八

五

庾亮墓

施志庾亮墓在縣東于家寨 施志按庾氏自晉南  
渡後家乘無考謹據于氏子孫所傳紀之于卽庾因  
事改姓 蒙按晉書蘇峻傳云蘇峻旣爲彭世李千  
等所斬峻司馬任讓共立峻弟逸爲主求峻尸不獲  
峻子碩乃發庾亮父母墓又按摛神記云文康鎮武  
昌連徵不入尋薨下都葬焉據此則庾亮父母已葬  
江左亮亦未還葬鄆陵于氏子孫所傳未可憑也

肇恕墓

沈鯉撰梁策墓誌云捐義冢予貧民安厝用比於掩

酪埋甍有頃夢見一老人語君曰不祿隋處士肇恕也今居無所敢卽君謀及旦而鬪地得石則大業元年志而恕故兆也君爲文祭之更爲封樹 焦竑徵獻錄梁策嘗夢一緋衣幘頭人呼曰梁孝子我後漢肇恕葬我葬我詰旦園丁鬪地得石果肇恕墓爲文祭而葬之 名山藏本行記同 蒙按梁策墓誌以肇恕爲隋人徵獻錄名山藏以肇恕爲後漢人墓誌本其子可養所撰行狀而作似屬可憑惜不詳其地耳

杜如晦墓

文獻志

卷八

六

經志杜如晦墓在縣南一里 施志按如晦字克明京兆杜陵人與房元齡同事太宗爲賢相及薨圖像凌烟閣詔虞世南勒碑誌其墓在萬年縣南三十里萬年卽今咸甯碑現在司馬邨又事文類聚唐貞觀七年祀於昭陵詔以少牢祭杜如晦墓是在長安也在鄆恐誤 明張琳詩唐相元廬在萬年鄆墟華表訝孤阡松陰鬱鬱青含露草色淒淒碧帶煙一徑野花春夜雨數聲啼鳥夕陽天城闔回首懷前哲不是臨碑有悵然

張萬戶墓

經志張萬戶墓在縣南一里有石碑一方 蒙按張萬戶墓在城西南唐莊前墓已平夷而石虎尚存故人猶得指識其處吳志引張九萬戶新軍張萬戶以實之皆係附會而鄢在元代實有張榮其人攷元史張榮傳云賜虎符授懷遠大將軍子奴婢孫君佐均襲職至元八年君佐調守襄陽十年召蒙古漢人萬戶陞見各以功受賜帝親諭之令還鎮張君佐既官萬戶此墓疑卽榮與君佐之墓矣又按劉連鄉先賢列傳云張榮墓在今城西南其地亦恰相符云

李伯昭墓

文獻志

卷八

七

施志李伯昭墓未詳所在 元雅琥鄢陵經進士李伯昭墓詩激烈山陽笛淒涼祖逖鞭才高天不惜命薄世空憐故里一邱土荒城五畝田雖云有宿草甯忍不潛然

趙得用墓

蒙按元揚州路判趙得用墓在城西南圪墘頭前百餘步邑人陳溥撰世系碑

陳諒墓

陳棐曰八世祖諒元至正閒授鄭州路學正其墓在福邨塋

祈都督墓

經志祈都督墓在安頭邨

黃耆冢

經志黃耆冢在七里橋 蒙按黃耆冢乃老者之冢  
非黃狗冢韓程愈藥樹庵記作黃狗冢且引狗沾草  
救主事以實之按狗沾草救主一是廣陵楊生事見  
續摻神記一是紀南李信純事見無如皆不在今鄆  
陵韓氏傳會於此蓋出於流俗之傳聞未足據也  
無名冢五

經志南三里冢東三里冢西雙冢東南孤冢西南三

文獻志

卷八

八

里冢

翟巖辰墓

施志明鄆陵教諭翟巖辰墓在縣東南城隅洪武四  
年勅命勒石文剝蝕不全

夏榮墓

施志明孝子知縣夏榮墓在縣南五里溝前周二十  
畝所廬父墓昭次成化間曾奉監司檄修

李本墓

蒙按明大理寺少卿李本墓在城南一里邑人張守  
仁撰世系表



曹通墓

施志南京兵馬指揮曹通墓在縣南張橋店西

牛興墓

施志處士牛興墓在縣東南二十里子運同良孫知縣理曾孫刑部郎中緩同塋 薛瑄撰墓表云處士沒葬於趙坊之先塋

張睿墓

施志勅建戶部尚書張睿墓在縣西北二里岡上贈尚書祖顯道父著塋右 張琳勅修大司徒張公墳塋記鄆陵邑西距城一里許有大岡焉左剝右林木

文獻志

卷八

九

樾蒼潤後抱以河縈紆環繞若玉帶然前臨馬欄鎮之浮圖筆立插天其東西巨津號曰西湖在昔一望浩渺無際秀鍾氣聚真勝絕之境也我大司徒張公之勅修先塋在焉張公名睿字志通友竹其別號也早歲以名進士發身歷官四朝功成身退優老於家卒於正寢有司上聞卽下葬祭之命遴選近臣而專督之山右臨汾進士董公實承斯役將命下車會議於藩臬大府別修築於先塋之左量力鳩材凡十一州縣翕然協從命工營爲莅事惟謹弗過於嚴而困其力弗失於寬而怠厥事簡而不疏信而不執明而

不察遂使能者彰而惰者勸不三月翛然成功其磚牆週迴數千尺上覆以瓦前立勅修坊華表石柱磚門三楹後建饗堂三楹次則兩廊各三楹而誥命碑亭五座突然高出其中輪奐翬飾金碧爭耀他如翁仲馬虎羊屬俱琢石成象制度無不完好上有以彰大國家禮賢之恩下有以激勸臣子盡忠之義向使非德如董公或勤惰無稽或戒令弗亟必無以體朝廷之心抑亦有孤盛恩矣厥功既成凡鄉邦黎庶皆知踴躍忻忻而起觀感之心緇衲道流亦能爭先快靚而興企仰之志况慕義強仁者甯不感動奮發而

樂於有爲乎又况爲張氏子姓沐恩深至豈不思披肝露赤而圖報國家之厚恩乎工始於成化辛卯十一月十九日訖於成化壬辰二月望日落成之日大司徒公之冢嗣綺徵記於余辭不獲已遂述其始終使歸而刻諸石焉 陳棐重修戶部尙書張公瑩碑記嘉靖庚子孟冬先達大司徒張公睿塋墓有司重葺告成公之孫斷事君瓘曾孫鄉進士時興首勞厥事適觀厥成稽首拜手曰慶哉幸哉君恩洋洋乎渥哉綿延乎祖德哉陳子曰嗚呼休哉惟我皇上登極改元十有五祀奉先崇孝治優千古儀定四郊典隆

九廟禮樂明備神人胥悅乃前星炳靈篤生元良國  
有儲貳兆民允康天子乃下詔海宇覃恩臣庶無有  
遠邇咸稱厥施大臣久沒墳域頽毀僉令有司相時  
修葺嗚呼聖天子之意其至仁哉惟我大司徒明允  
篤誠克懋於學始由進士給事省中敷奏詳明言議  
侃侃於時公有建白之績爰晉亞卿通州司儲修倉  
設厰量入爲出於時公有度支之勤天順之變敵迫  
京邑上遣手勅俾燬通儲公曰不可民膏可恤於是  
敵退載陞司徒於時公有濟變之謨嗚呼司徒公之  
業其至忠哉惟我撫臺易公胡公魏公稽古尙賢承

德宣化奉恩旨惟謹府判郭君廷桂計費設料輸計  
官帑邑令冷君孟章汝君頤警惰責成時加獎率監  
工義官李梅王尙忠指示奔走民不告勞堂廂拱翼  
周垣修潔門坊亭石易舊爲新瑩遂改觀嗚呼當道  
執事諸君之役其至順哉惟有大司徒之忠公斯被  
聖天子之仁典惟有聖天子之仁典斯致當道諸君  
之順承茲役也君恩祖德之重爲張氏子若孫者悉  
宜永念而不忘也事竣之日斷事君遣其弟瑯姪時  
旦來委余紀諸石余書其大者如此而系之以詩云  
邑有異靈國有楨幹兆生司徒爲璋爲瓚奮身甲第

著節諫垣亞卿民部鳴鳳高騫公曰予遇帝曰予知  
靖敵之變厥功最奇乾極弗居龍御在野上下訥訥  
隄戩城社天儲億萬據彼通源民命攸係國脉攸存  
手勅亟焚公議勿遽不震不怵敵衆果去陵廟載甯  
疆場載清視我糧芻如坻如京帝嘉丕績晉秩司徒  
公尋告歸邱壑自娛勅葬有壟高岡蟠蟠奕奕堂廡  
塏塏壁壇寵詔一新妥安千祀伊誰之力有曾孫氏  
允掇賢科清白祖誠祇勤視工夙夜匪懈有公之忠  
獲孫之孝餘慶之長種德之報孫孝乎祖祖佑乎孫  
登庸顯績益大其門余官內省來拜新塋爰勒詩章

文獻志

卷八

十一

用垂頌聲

程鶴墓

施志嘉興府同知程鶴墓在縣南杜郎邨祖塋偏右  
翰林董越爲撰塋記尙書劉訥銘其墓 董越程公  
先塋記程在山西爲著姓其遷河南之鄆陵莫詳所  
自大抵更歷世變孫枝蕃衍各從散處也河以南多  
水患且當天下要衝鄆陵正界其南在春秋時已爲  
受敵所而洧水汎溢時或及之故百年之桑梓數世  
之墟墓不陵夷蕩析者鮮矣獨鄆郡貳守程公其先  
塋可紀焉自其曾祖義祖百源以及其先大夫建皆

葬鄭家邨之河龍灣族屬衆盛比屋聯居者不啻五千指而皆以是爲之祖歲時薦享恭止墓下少長羣集倫序秩然灑麥飯而飲祭餘肅肅雍雍程氏之宗祊於斯盛矣夫延世遠則祖宗之德澤長族屬衆則宗支之情誼疎而程氏繼繼繩繩無墜家聲何以得此於後人哉蓋自其先旣以詩書禮義垂範後昆又能篤養生送死之誼及其曾元所以世遠而德益彰族盛而情倍篤也至其先大夫樂善循理克篤義方見貳守公生而穎異卽遣遊庠序業舉子果以明經領景泰庚午鄉薦偕計上春官循資初試得同知青

州郡以外艱卽吉改佐吾穎剛正之氣廉辯之才公明之譽孚於上下郡有難事恆賴以集行部所至獎勵官屬以修職業嚴督士類以飭教典修起墜廢以順民望而鋤姦剔蠹強暴斂跡誠二千石之良佐不愧於爲民父母者也予嘗謂公之剛果有爲固得於學力而詳審精密獨中事機竊疑其必有以啟之者今觀世德作求益信淵源有自然邱墓繫吾人水木本源而封培不廢恆於其子孫之賢見之孔子所以不墓而墳王制所以不斬邱木爲是故也程氏之先塋今百餘年邱壠矗峙松楸鬱葱雖其前人貽謀之

善要亦其子孫共率先德能保而有之也貳守公茲以九載課最當陟明矣間爲弟子詳述家世因請記載其事書以告後之人焉

### 孫達墓

蒙按澧州知州孫達墓在縣西南與姪知州傑同塋又按選舉表云孫達字九達經志施志作孫達誤鄢陵科貢題名碑云孫達官都察院司務升湖廣澧州知州則司務非其所終官也經志施志作司務孫達墓亦誤

### 解禮墓

## 文獻志

### 卷八

十四

蒙按孝子解禮墓在城西南一里邑人劉樞撰塋記

### 劉璟墓

施志勅建宮保刑部尚書劉璟墓在縣東龍形岡北大學士楊廷和銘墓贈尚書祖義父海俱葬祖塋右明陳溥記嘉靖壬辰夏大司寇怡閒劉公塋成後學澹亭陳子溥來拜公祠下且觀焉公之仲子侍御君訥偕姪述遂适远迴延以進之陳子曰塋也備矣哉旣而曰遠矣哉以山以渠風氣完萃安體魄矣以堂以祠廚庫嚴飭奉烝嘗矣碑勒勅諭昭寵眷矣石刻獸類列儀衛矣立門與坊達之通衢闢神路矣樹

栢與楊繚之周垣限樵採矣六者具焉是之謂備遵夫品式則於古昔堅不徒麗完不徒費在物者可久也訓誡有詞典守擇才曰葺無壞日增無敗在人者能久也二者具焉是之謂遠備以奉先遠以傳後其侍御君之功與君拱而辭曰毋先大司寇歷仕三朝陟階一品沒而賜葬時王有章吾父之忠承君寵也余何功諸昆於是趨而進曰叔父安辭昔祖薨之三年而塋功未就吾見叔父哭於墓以行而延伫不忍去故身雖按於遼按於蘇四郡而每懸心於鄆北栢楸也所謂王事靡盬我心傷悲者非歟既而以終養

得告吾見叔父甚喜喜色養吾祖母而並追養吾祖父故滄澹之餘輒經墳事凡一方位一木石悉出心思區畫矣所謂事死如事生者非與功哉叔父君曰毋天子昔遣冬卿營兆上司移檄有司勸事吾君之寵表父忠也余何功諸昆再趨而進曰叔父安辭建墳詔下動踰一紀工方興而遽輟財已聚而復耗今叔父歸也言於撫按撫按允之速曰非是胡以風世移於府縣府縣奉之力曰其何以稱明德監工日號百工咸理茲以十閱月而功就緒矣功哉叔父君曰毋崇岡西來如龍走陸環抱於斯委蛇起伏勢合眠

牛卜協青烏乾作坤藏待人而予意者天設此地以彰君父殊遇也余何功諸昆又趨而進曰叔父安辭天或以人而就形或以力而成聞昔卜兆之初雖蛇雉呈祥金翁獻吉茲傳五世然猶墟耳而叔父奔自甯國攜地理之家繪風水之圖使突然一山忽縈然一渠罅者完之斜者端之而天者全矣功哉叔父侍御君猶將退然避也陳子遂揖而言曰侍御君其有後哉諸昆其克昌哉天心贊工會宗趨事良與力也迺知首重而崇功於侍御君君亦弗自居也又本於君父而終之天善稱親則能慕德歸君則能報慶承

天則能敬慕親者順報君者顯敬天者佑侍御君誠有後哉崇功於叔是謂尊尊尊則敦本敦本則睦族睦族則勸業而進德諸昆亦信克昌哉怡閒公適子鴻臚君詵季子承事郎訥亦皆天性孝友嘗協謨同力於瑩工惜乎未觀厥成相繼云沒述遂鴻臚君之子适迓迴承事郎之子也餘暨侍御君之子巡俱以幼時弗在列諸昆因請陳子記之以勒侍御君之功於是援筆錄實復作頌焉頌曰於維鄢城勝地鍾英挺生人傑翊我皇明國之典刑王之喉舌大獄旣平匪撓弗折功成身退天子曰俞月廩歲隸寵渥優



殊訃音上聞天子震悼詔賜建墳爰厚其報司寇維  
忠致君禮葬祖兆並修孝實君貺司直維孝完厥塋  
功感君厚恩益勸其忠坊門峙起堂廂翼翼列栢蔭  
舊石形嶠直山倚其陰飛流在陽高封馬鬣環抱龍  
岡夏庭劉祖御龍賜氏今龍化形對阡拱峙佑我怡  
閒見而在田弗亢弗悔歸老宅淵矯矯侍御沛爲霖  
雨暫臥而騰厥施斯普德厚流光善積餘慶勿替引  
之振振公姓昭穆克明春秋祀聚濟濟蹒蹒威儀孔  
度不騫不崩時萬時億豐碑有文過墓者軾

張弼墓

文獻志

卷八

十七

施志明行人司司副張弼墓在縣南曲莊西北

陳銓墓

施志封戶部主事陳銓墓在縣西十里大學士賈詠  
誌其墓子參議溥孫都御史棐同塋 陳棐祖塋門  
銘云塋有門何也緣情循禮而創也吾鄢東望陳都  
胡公之封也百里而遙吾塋北望漆井漢陳太邱墓  
也二里而近故世傳陳氏爲舜後而吾族爲文範裔  
余八世祖諒元至正間授鄭州路學正其墓在福邨  
塋七世祖希賢國朝洪武初授鐵冶都提舉至六世  
祖灝爲陰陽訓術乃改卜兆於斯奉厥考葬焉余高

曾祖祖咸以昭穆敘從兆嘉靖丁酉余考參伯澹亭  
公不祿余率弟營葬塋週築垣共二百丈高六尺四  
寸厚三尺六寸頂覆以甃垂翼瀉溜腳封土堅築護  
垣前啟三門中扁曰世德佳城左曰涵靈右曰毓秀  
凡歲時俎品及壽考而窆者由中門入凡卑幼生而  
來並殤而祔者與雖非殤而在宗子爲卑及婦皆由  
旁門落成余號於族曰吾族知斯門之內爲祖考所  
在而子孫所履吾族如有仕而弗恪共厥職居則忤  
於父母弗左右孝養於兄弟大弗友於妻子弗能刑  
者不可履此門也其有棄四民本業儒不苦讀農不

躬耕交狎非類博奕崇飲又罔知治生或稍知居積  
而駟儉狡詐者不可履此門也其有不能訓子義方  
且納於邪異鬻別產不相顧者不可履此門也其有  
挾一秩一藝凶戾悖懟弗恭尊長弗字孤嫠者不可  
履此門也其有於塋墓不能修拓反侵損之折樹木  
壞甃石伐荆榛以殖己且竊貿焉者不可履此門也  
其有春秋不修祀節忌不上食家不供主土不設祠  
者不可履此門也生旣履此門而有愧祖考不佑之  
沒則入此門而有玷祖考不安之吾族可不念哉族  
之人咸起而拱曰諾人雖不敏將求不負於規誨庶

不愧於祖考矣因識而系之銘曰天蓋有門地蓋有  
戶樞機所招爲災爲祐門以防邪邪者弗佑門以納  
佑佑者弗邪中正崔嵬平直洞開正則安固欹則傾  
頹吾族念之去邪從正處厚善倫畏法修行族原一  
門支別派繁歸根復命仍同一原今雖千指始於一  
祖所貴敦睦毋相疎侮闢戶乾開闔戶坤閉陰陽一  
橐死生共蒂所以事死當如事生如天之敬如在之  
誠墓以藏魄垣以藏墓氣萃風藏栢楊斯護戒我後  
人益大門垣千秋萬祀重此本源

劉訥墓

文獻志

卷八

十九

施志勅建太子少保刑部尙書劉訥墓在縣東龍形  
岡北大學士高拱誌墓子知府巡同瑩高陽許初誌  
墓

胡東魯墓

蒙按四川布政司左參議胡東魯墓在城東胡岡新  
鄭大學士高拱誌墓云葬公於龍岡山下之新瑩

王璣墓

施志深澤縣知縣王璣墓在縣東都御史陳棐誌其  
墓

梁策墓

一統志梁策墓在鄆陵縣東南孝子岡策以孝稱大學士沈鯉誌其墓

劉連墓

施志略陽縣主簿劉連墓在縣東龍形岡北

梁範墓

施志束鹿縣縣丞梁範墓在縣西北岡上

鄭友諒墓

施志麻哈州知州贈都御史鄭友諒墓在縣西棲良邨大學士錢士升誌其墓

常應泰墓

文獻志

卷八

二十

施志贈刑科給事中常應泰墓在縣南羅寨

梁克從墓

施志太常寺少卿封兵部尚書梁克從墓在縣南梁氏老家贈大司馬父愼瑩左 韓程愈記梁吟梁改葬伯父奉常公事云康熙二年歲癸卯梁子廷撰就汴啟其伯父奉常公之喪於淹沒之墟而出之暫殯於野以謀改葬余聞而嘉之先是奉常公遭崇禎辛巳之亂憂鄆陵破亡餘壘不可支壬午春攜其室百十人入保於汴已而賊往來彝門攻掠不肯去會城中守益堅遷延至九月決黃河水灌之水至而三版

絕沈沒之禍成於是城中人死者不可勝計奉常公  
年既高久處危城中日夜聞羅雀掘鼠易子析骸事  
益憂懼六月卒於靜庵街居第家人殯其柩於庭之  
西南隅未幾而城沒家人無少長男女皆死之自是  
黃河之水浩渺洶濊日覩白浪洪濤有識者不敢信  
有揚塵之事焉 皇朝順治初 天子命吏治河  
大施金錢民力以補救之河漸次入故道大梁之城  
社復立又十年居民有復業者郡守邑令署治其中  
生聚招來丁口以萬計又十年制府之鼓旗建焉御  
史中丞之臺設焉鄉貢士之院闢焉商旅之輪蹄輻  
湊焉人聲馬嘶釜烟爐火酒肉之氣逆人羸有啟順  
之風而抱沈鬱於荒落之地者尙不知其幾許也廷  
撰日夜念旅魂不置適以事至郡過奉常公之墟而  
哭之欲謀改葬而不得其處見一叟荷鍤立問之則  
其鄰也昵昵言當日事甚悉遂得其柩之在庭西南  
隅者扣其棺硜硜然啟而視之則奉常公衣冠楚楚  
容體如向也乃舉而厝之野徐商後事夫奉常公名  
卿耆儒齒與德並晚遭不偶闔門駢死幽魂淹滯已  
分塵埋今二十餘年忽得輿櫬里門待歸故壠則廷  
撰之孝思安可以不書也哉廷撰字吟梁奉常公少

弟克紹之子也

梁克順墓

施志御史梁克順墓在縣南曲莊村尚書斬于中誌墓

韓自重墓

施志封知縣韓自重墓在縣東北阮寨子知縣法愈墓在東阮寨

劉賁卿墓

施志四川夔州府知府劉賁卿墓在城東北刑部尚書訥舊塋

文獻志

卷八

二十一

梁廷棟墓

施志太子少保兵部尚書梁廷棟墓在縣東南孝子岡

鄭二陽墓

施志巡撫安慶都察院右僉都御史鄭二陽墓在楊河邨西北

常自裕墓

施志誥贈通議大夫有明戶部左侍郎常自裕墓在縣南西羅寨大學士張玉書誌墓

杜邦舉墓

施志鄆陵縣典史杜邦舉墓在縣大北關路西雙忠祠後乾隆壬辰十月知縣施誠重修并立碑表墓

趙申寵墓

蒙按孫奇逢撰墓誌云趙公申寵灤州人歷官陽信令陝西莊浪同知湖州府同知汀州府同知未及行突遇疾卒於浙庚子柩歸寄葬於鄆陵伏邨之東原因子御衆客鄆其友梁廷援爲卜地云

王秉謙墓

施志 國朝鄆陵縣知縣王秉謙墓在縣東南城隅  
梁熙墓

文獻志

卷八

二十二

施志御史梁熙墓在縣南梁老塋

常錫允墓

施志山西道御史常錫允墓在縣南東羅寨

常翼聖墓

施志大理寺正卿常翼聖墓在縣南東羅寨大學士

史貽直誌墓

常鉉禡墓

施志刑部主政常鉉禡墓在縣南東羅寨禮部尙書

湯右曾誌墓

王兆祥墓

蒙按孝子王兆祥墓在城北七里橋之右邑人蘇瑛  
撰墓碑

### 漏澤園

施志漏澤園在縣南五里溝前宏治間知縣王時中  
勸諭義官程鳳出地周回三畝

### 北義冢

蒙按北義冢在北關外文昌閣西以葬貧民及客死  
者

### 東義冢

蒙按東義冢在東關外一里大路北咸豐八年源生

## 文獻志

### 卷八

二十四

用志仁堂貲買沈姓地共四畝五分五釐

劉訥曰古冢之發自漢赤眉至元僧璉極矣鄢陵境  
內高大之冢最多然鮮有不發者近年古城北岡奸  
黠之徒又往往辨土色稍異者卽知爲隴掘數丈深  
得石門礎銅鑪瓶之類不可勝計其制甚侈非王卽  
侯閒有碑誌輒先剝毀嗚呼是其撰刻者忍料至此  
耶